

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. जम्मू-कश्मीर विधानसभा दा इजलास अज्जै थमां शुरु होआ करदा ऐ। अज्ज सदन दे स्पीकर दा चुनांS होग।
2. अब्दुल रहीम राथर होर केन्द्र शासित प्रदेश विधानसभा दे पैहले स्पीकर ते नरेन्द्र सिंह होर डिप्टी स्पीकर होडन।
3. एनसी कांग्रेस गठबंधन ते बीजेपी नै असैम्बली दे इजलास गितै अपनी-अपनी रणनीति तैयार कीती।
4. प्रधानमंत्री नरेन्द्र मोदी होरें आखेआ ऐ जे मुल्खै च टीबी दे मामलें च आई दी कमी, भारत दे अनथक जतनें दा नतीजा ऐ।
5. बाबा जित्तो हुंदी सुच्ची सम्हालै च 10एं दिनें दा ऐतिहासिक झिड़ी दा मेला औंदी 14 नवम्बर थमां शुरु होग।

<><><><><><>

Assembly Session

जम्मू-कश्मीर असैम्बली दा 5 रोजा इजलास अज्जै थमां श्रीनगर च शुरु होआ करदा ऐ। प्रोटेम स्पीकर मुबारक गुल हुंदे आसेआ जारी कलेंडर मुजब, अज्ज असैम्बली दे स्पीकर दा चुनां बी होग जेहदे मगरा उपराज्यपाल मनोज सिन्हा होर सदन गी सम्बोधित करडन। कल 5 नवम्बर गी पैहले शा पैहले आहली असैम्बली दे बाद कोला हूनै तगर पूरे होए दे विधायकें गी श्रद्धांजलि भेंट कीती जाहग जिसलै के 6 ते 7 तरीक गी उपराज्यपाल हुंदे अभिभाषण पर धन्नवाद प्रस्ताव पर चर्चा होग ते खीरी रोज चर्चा दा परता दित्ता जाहग। अज्ज शुरु होआ करदे इजलास गी ध्यानै च रक्खदे होई सुरक्षा दे लोडचदे बंदोबस्त करी लैते गेदे न ते कल श्रीनगर च होए दे ग्रनेड हमले ते ओहदे शा पैहले शैहरा दे खानयार इलाके च लश्करे तैयबा दे कमांडर उस्मान भाई दे मारे जाने दे बाद सुरक्षा बंदोबस्त होर निगगर करी लैते गेदे न।

<><><><><><>

Speaker

चरार—ए—शरीफ थमां 7 बारी विधायक रेही चुके दे अब्दुल रहीम राथर हुंदा जम्मू कश्मीर केन्द्र शासित प्रदेश दी विधानसभा दा पैहला स्पीकर बनना तैह ऐ। अज्ज शुय होआ'रदे यूटी असैंबली दे पैहले पैहले इजलास लेई जारी कलेंडर मूजब अज्ज पैहले रोज सदन अपना स्पीकर चुनोग। विधानसभा दे सचिव मनोज कुमार पंडित हुंदे आस्सेआ जारी विधानसभा दी कारवाई दी अधिसूचना मूजब, राई बाई, ग्रामीण विकास ते पंचे दी राज मंत्री जावेद अहमद डार स्पीकर दे चुनां लेई प्रस्ताव गठबंधन ते एडवोकेट अब्दुल रहीम राथर होरें गी रस्मी तौरा पर स्पीकर चुनी लैता जाग। राथर होर पैहले बी जम्मू कश्मीर विधानसभा दे स्पीकर रेही चुके दे न। 2002 कोला 2008 तगर जदू जम्मू कश्मीर इक राल्य हा ते इत्थें पीडीपी ते कांग्रेस दी भयाली आली सरकार ही, तदू बी राथर होर सदन च विपक्ष दे नेता हे। स्पीकर दे चुनां दे बाद सारे विधायक बडलै साढ़े 11 बजे उपराज्यपाल हुंदे अभिभाषण लेई असैंबली हाल च किट्ठे होंगन।

<><><><><><>

Assembly NC Congress

जम्मू—कश्मीर केन्द्र शासित प्रदेश दे पैहले—पैहले असैंबली इजलास दे मददेनजर नेशनल कांफ्रेंस ते कांग्रेस दे सत्ताधारी गठबंधन नै कल इक बैठक लाइयै अपने कम्में—कारवाईएं पर चर्चा कीती ते कश्मीर च पैदा होए दे सुरक्षा हालात पर चैता बुज्जी। एनसी ते कांग्रेस नै एहदे शा पैहले श्रीनगर च पार्टी विधायक दल दी बक्खरी—बक्खरी बैठकां कीतीआं ते फही सांझी बैठक लाई। इस बैठक च 5 आजाद विधायकें सने सीपीआई (एम) दे विधायक मोहम्मद युसुफ तारीगामी होरें बी शिरकत कीती। नेशनल कांफ्रेंस दी बैठक दी प्रधानता पार्टी विधायक दल दे नेता ते मुख्यमंत्री ओमर अब्दुल्ला होरें कीती जदके कांग्रेस पार्टी दी बैठक दी प्रधानता उंदे प्रदेश अध्यक्ष तारिक हमीद कर्मा होरें कीती। दौनें पार्टिं एसैंबली च अज्ज होने आहले एलजी मनोज सिन्हा हुंदे सम्बोधन पर चर्चा सरबन्धी रणनीति तैयार कीती। बैठक दरान कश्मीर च हाल च होए दे आतंकी हमलें च बाददे बारै बी चर्चा कीती गई। सदन च सत्ताधारी गठबंधन दे विधायकें दी गिनतरी 55 ऐ ते बीजेपी नेता देवेन्द्र सिंह राणा हुंदा काल होई जाने दे बाद बीजेपी विधायकें दी गिनतरी हून 29 शा घटियै 28 होई गई ऐ।

<><><><><><>

BJP LoP

बीजेपी दे वरिष्ठ लीडर ते साबका मंत्री सतत शर्मा होरें गी जम्मू कश्मीर बीजेपी दा नमां अध्यक्ष बनाया गेआ ऐ ते भाजपा दे वरिष्ठ नेता ते एम.एल.ए सुनील शर्मा होरें गी विपक्ष दा नेता चुनेआ गेआ ऐ। एहदे इलावा नरेंद्र सिंह होरें गी डिप्टी स्पीकर नियुक्त कीता गेआ ऐ। एह फैसला भाजपा दे वरिष्ठ नेतृत्व नै कल श्रीनगर दे सोनवार च चर्च लेन च होई दी इक बैठक च अपने विधानसभा दे सब्बनें 28 सदस्यें कन्नै मिलियै कीता। इस बैठक च श्रीनगर दे विधानसभा परिसर च अज्ज शुरू होने आहले विधानसभा सत्र लेई बीजेपी दी रणनीति

उप्पर बी चर्चा कीती गई। नगरोंटा दे विधायक देवेन्द्र सिंह राणा हुंदा चानचक्क काल होई जाने कन्नै बीजेपी दे विधायकें दी गिनतरी 29 थमां घटियै 28 होई गई ऐ।

<><><><><><>श

Special Trains

ध्यारें दौरान यात्रिएं दी सहूलत आस्तै रेलवे दिल्ली-एन.सी.आर. थां मुख्य दे बक्ख-बक्ख हिस्सें आस्तै 20 रेल गड़ियां चला रदा ऐ। इंदे च दरभंगा, बरौनी, पटना, कटड़ा, मुजफ्फरपुर, बलिया, कामाख्या ते आजमगढ़ लेई रेल गड़ियां शामिल न। छठ पूजा लेई 145 बाढ़ू रेल गड़ियां 2 थां 8 तरीक बश्कार चलाइयां जा'रदियां न। रेलवे आस्सेआ चलाई जा'रदी इनें रेल गड़ियें कन्नै 2 लक्ख यात्रुएं गी हर रोज यात्रा दौरान सहूलत होग। भारतीय रेलवे पैहली अक्तूबर थां 30 नवंबर बश्कार तकरीबन 7 जहार खास रेल गड़ियां चला'रदा ऐ। इस दौरान तकरीबन 1 करोड़ यात्रुएं गी सहूलत होग। हर ब'रे रेलवे ध्यारें आहली रूतै दौरान खास रेल गड़ियां चलांदी ऐ। पिच्छले बरे दे मुकाबले इस बरे 2 जहार 800 मती रेल गड़ियां चलाइयां जा'रदियां न।

<><><><><><>

PM-TB

प्रधानमंत्री नरेंद्र मोदी होरें आखेआ ऐ जे टी.बी. दे मामले च कमी भारत दे समर्पित, अनथक ते अभिनव जत्नें दा गै नतीजा ऐ। मुख्य दी प्रगति दी सराहना करदे होई मोदी होरें सोशल मीडिया पोस्ट च उनें आखेआ जे सामूहिक भावना राएं सरकार टी. बी. मुक्त भारत दी दिशा च कम्म करदी रौहग। विश्व सेहत संगठन मूजब भारत च 2015 थमां 2023 तगर टी.बी. दे मामले च 17 अशारिया 7 फीसद दी कमी दर्ज कीती गई ऐ। एह दर वैश्विक गिरावट 8 अशारिया 3 फीसद थमां दूनी बी मती ऐ। सोशल मीडिया दी इक पोस्ट च जानकारी सांझा करदे होई सेहत मंत्री जे.पी. नड्डा होरें इस गल्ला पर जोर पाया जे टी.बी. दी रोकथाम भारत दे तब्दीलिएं आले नजरिए गी दर्शांदी ऐ।

<><><><><><>

Jhiri Mela

उत्तर भारत दे सब्बने शा बड़डे मेले चा इक एतिहासक झिड़ी दा मेला इस महीने दी 14 तरीक कोला शुरू होआ'रदा ऐ। 10एं दिनें तोड़ी चलने आले इस सलाना मेले लेई तैआरिएं जोरें-शोरें जारी न, जिंदे पर जिला ते प्रशासनिक अधिकारी नेड़मी तक्क रखा करदे न। जंदे रोज उपमुख्यमंत्री सुरिन्द्र कुमार चौधरी होरें इक उच्ची सतह दी बैठक सदिदयै मेले लेई तैआरिएं दा जायजा लैता हा। करसानें दे मसीहा खोआने आले अमर शहीद बाबा जित्तो हुंदी सुच्ची समेयालै च एह मेला हर ब'रे कत्ते महीने दी पूर्णमाशी गी लगदा ऐ ते जम्मू

कश्मीर दे इलावा पंजाब, हिमाचल प्रदेश, दिल्ली, राजस्थान ते हरियाणा दे केई इलाके थमां लोक इत्थें मत्था टेकने लेई आँदे न। ऐकती 20 लक्ख लोकें दे इस मेले च शामिल होने दी मेद ऐ।

<><><><><><>

Grenade

घाटी च कल अकाशवाणी श्रीनगर दे दफ्तरै बाहर संडे मार्किट च होए दे ग्रनेड हमले च घट्टोघट्ट 10 लोक जख्मी होए न। रिपोर्ट मूजब आतंकवादिणं टीआरसी क्रांसिंग पर सुरक्षाबलें दी गड्डी पर ग्रनेड सुट्टेआ जेहड़ा नशाने पर नेई लग्गा। शिड़कै पर जाइयै फटेआ। श्रीनगर दी मशहूर संडे मार्किट च लोकें दा बड़ा मत्ता रश हुंदा ऐ। हमले दे तुरत मगरा पुलसै इलाके दी घेराबंदी करियै हमलावरें दी धरपकड़ लेई अभियान शुरू करी दित्ता। भारी सुरक्षा आहले टूरिस्ट रिसेप्शन कीता गेदा एह हमला लश्कर-ए-तैयबा दे इक शीर्ष पाकिस्तानी कमांडर गी सुरक्षा बलें आसेआ डाउन टाउन श्रीनगर दे खानयार इलाके च खत्म करने दे इक दिनै बाद कीता गेआ ऐ। उपराज्यपाल मनोज सिन्हा होरें श्रीनगर च ग्रनेड हमले दे बाद पुलसा दे डरैक्टर जनरल नलिन प्रभात ते सुरक्षा अजेंसिणं दे होरने वरिष्ठ अधिकारिणं कन्नै गल्लबात कीती ते उनेंगी आखेआ जे ओह आतंकी नेटवर्क दा समूलचा नास करन। उनें आखेआ जे आम नागरिकें गी नशाना बना करदे आतंकवादिणं गी एहदी भारी कीमत चुकानी पौग। मुख्मन्त्री उमर अब्दुल्ला होरें श्रीनगर च संडे मार्केट च होए दे ग्रनेड हमले दी निंदेआ कीती। इस हमले च 10 लोक घायल होए। उनें आखेआ जम्मू-कश्मीर च हाल च बदा'रदी आतंकवादी घटनाएं गी रोकने आस्तै सुरक्षाबलें गी हर संभव कोशश करनी लोड़चदी। घायलें च 2 महिलां बी शामिल न। सोशल मीडिया दी इक पोस्ट च उमर होरें आखेआ जे पिछले किश दिनें दौरान घाटी च आतंकवादी हमलें दी खबर सुर्खियें च बनी दी ऐ ते श्रीनगर दी संडे मार्केट च होए दे हमले च केई मासूम ते बेकसूर लोक घायल होए न जेड़े कि बड़ी गै मंदें भागें आहली गल्ल ऐ।

<><><><><><>

ADGP Reasi

जम्मू कश्मीर पुलस दे अतिरिक्त महानिदेशक आनंद जैन होरें उधमपुर-रियासी रेंज दे डीआईजी रईस भट्ट ते पुलस दे होरने वरिष्ठ ऐहलकारें दे कन्नै कल रियासी संगलदान रेल लाईन दा व्यापक सुरक्षा आंकलन कीता। इस मौके पर एनें रियासी रेलवे स्टेशन ते चिनाब दरेया पर बनाए गेदे रेलवे पुल जनेई महत्वपूर्ण थाहरें दा निरीक्षण करियै संगलदान थमां रियासी तगर दे रेल गलियारे लेई सुरक्षा स्थिति दा जायजा लैता। इस दौरै दा मकसद खित्ते च बड़ी मती महत्वपूर्ण थाहरें ते ढांचे दी सुरक्षा गी होर तगड़ा बनाना हा। एडीजीपी होरें इनें थाहरें पर गश्त, निगरान सरिस्ते ते कन्नू नाफिज करने आली बक्ख-बक्ख अजेंसिणं बश्कार तालमेल गी बधाने पर चेचा जोर दित्ता जां तो जे रेल यात्रिणं दी सुरक्षा ते संपत्तिणं दी हिफाजत जकीनी बनाई जाई सकै।

<><><><><><>

Bhai Dooj

भैनैं ते भ्राएं दे पवित्र प्रेम दा प्रतीक “टिक्के” दा ध्यार मुल्खै दे बाकी हिस्से आला लेखा कल जम्मू च बी परम्पारिक, श्रद्धा ते उत्साह कन्नै मनाया गेआ। भैनैं अपने भ्राएं दे मत्थे पर रौली, केसर ते चौलें दा टिक्का लाइयै उंदी लम्मी अरबला दी कामना कीती। इस मौके केई संगठनें ते व्यक्तिगत तौरा पर बी केई महिलाएं बन्ने पर तैनात फौज ते बीएसएफ दे जवानें गी टिक्का लाया ते मुल्खै दी राखी करने लेई उंदा आभार प्रगट कीता। केई लोकें यतीम खाने, वृद्ध आश्रमों ते बाल आश्रमों च एह ध्यार मनाया ते उत्थें रवै करदे बेसहारा बच्चें गी संदेश दित्ता जे ओह बी समाज दा हिस्सा न ते हर खुशी-गमी च पूरा समाज उंदे कन्नै ऐ।

<><><><><><>

DC Jal Jeewan

पुंछ दे डिप्टी कमीशनर विकास कुंडल होरें कल बनवत गुंडी नाईयां दा दौरा लाइयै उत्थें जल जीवन मिशन दे जारी कम्मों दा निरीक्षण कीता। अपने दौरे दरान डिप्टी कमीशनर होरें गी दस्सेआ गेआ जे इस योजना तैहत तकरीबन सब्बने परोआरें गी पानी दे कनेक्शन देई दित्ते गेदे न। डिप्टी कमीशनर होरें पानी दिएं पाईपें, पानी दे टैंक ते होर दुए ढांचे दे कम्मकाज दा जायजा लैता ते निर्देश जारी कीते जे हर इक परोआर गी पानी पक्क गै मिलना लोड़चदा ऐ।

<><><><><><>

Kishtwar Asrar

किश्तवाड़ च 10 नवम्बर गी लगने आले शाह असरार उद दीन साहब हुंदे सलाना उर्स लेई तैआरिएं गी मुकदा रूप देने लेई कल मैहकमा माल उे सहायक आयुक्त इदरीस लोन होरें सरबंधत मैहकमे दे अफसरें दी इक बैठक सद्दी। उनें उर्स गी पूरी चाल्ली रमानदारी ते बवस्था आले ढंगै सिर तोड़ चाढ़ने लेई सुरक्षा ते होर दुए सारे बंदोबस्त समें सिर करी लैने दे निर्देश दित्ते।

<><><><><><>